

25 AUG 2001

PWM-Merdeka

ROMBONGAN PWM-JELAJAH MERDEKA TIBA DI PERLIS

KANGAR, 25 Ogos (Bernama) -- Rombongan PWM-Jelajah Merdeka 2001 yang kini dalam rangka mengelilingi semenanjung Malaysia bagi membawa deklarasī kemerdekaan untuk ditandatangani oleh semua menteri besar dan ketua menteri tiba di sini hari ini.

Rombongan itu yang diketuai Presiden Persatuan Wartawan Melayu Malaysia (PWM) Yazid Othman disambut oleh Pengerusi Jawatankuasa Tanah dan Perhutanan, Mohd Hadzi Nordin yang mewakili Menteri Besar Perlis.

Hadzi kemudiannya menandatangani deklarasī itu bagi mewakili Menteri Besar Perlis pada majlis ringkas yang berlangsung di Dewan Residen di sini.

Lebih 100 peserta yang menaiki motosikal berkuasa besar menyertai program selama seminggu itu yang bermula di Kuala Lumpur semalam.

Yazid berkata program itu akan berakhir di Kuala Lumpur pada malam 30 Ogos 2001 bagi menyerahkan deklarasī yang ditandatangani oleh semua menteri besar dan ketua menteri kepada Perdana Menteri Datuk Seri Dr Mahathir Mohamad.

Sementara itu, kira-kira 40 kakitangan Hotel Putra Palace di sini meraikan sambutan bulan kemerdekaan dengan mengayuh basikal tua dan menunggang motosikal mengelilingi bandar Kangar dan berakhir di denai larian Sungai Perlis.

Pengurus Besar Putra Palace Ong Ah Aun berkata program itu diadakan sebagai menandakan rasa kesyukuran mereka terhadap nikmat kemerdekaan tanah air.

Turut mengadakan sambutan bulan kemerdekaan hari ini ialah warga Sekolah Kebangsaan Kubang Gajah dekat sini yang mengibarkan Jalur Gemilang raksasa di sekolah itu.

Guru Besarnya Azizan Ali berkata beberapa acara sampingan turut diadakan termasuk pertandingan melukis poster bertemakan sambutan hari kemerdekaan.

-- BERNAMA

AD RHM